

# LES REMARQUES

PARTICVLIERES DE  
tout ce qui s'est passé en la Redu-  
ction de la Rochelle : & depuis  
l'entrée du Roy en icelle.

*Ensemble les ceremonies observées au resta-  
blissement de la Religion Catholique  
Apostolique & Romaine.*


Avec la Conuersion de plusieurs Habitans  
de ladite Ville.



A P A R I S.

Chez Nicolas Roussier, Libraire en la  
grand' Salle du Palais, demeurant  
rue de la Pelleterie.

*Avec Permission.*



*Du jour de la Toussaincts 1628. dans la  
Rochelle, par la grace de Dieu.*



'Estonnement & le rauissement, la joye & le transport de tous les esprits en la reduction de la Rochelle, est si grand & si excessif que nous pleurons autant de joye que de laissement à la veuë de tant de miracles & de merueilles que Dieu nous fait voir aujourd'huy.

L'abaissement d'un peuple orgueilleux & superbe réduit aux abbois de la mort, & aux souspirs & gemissemens, plains de morts chez eux, nous fait horreur, d'un costé la vengeance & la justice de Dieu s'y voit sans aucune difference de cel-

3  
le de la ville de Hierusalem, sinon  
de son nom, la mort de 13. mil per-  
sonnes morts en 2. mois, de la fa-  
çon la plus violéte qui se puisse ima-  
giner, & cinq à six mil autres per-  
sonnes qui restoient en la ville, qui  
semblent plustost des ombres de la  
mort que des viuants: Et d'un autre  
costé les hauteurs & profôdeurs de  
leurs murailles, la beauté de ceste  
ville, son port, son abord, tant de  
merueilles dy-je nous font adorer  
les secrets jugemens de Dieu sur la  
reductiô de ceste Babel miserable,  
qui tout à coup est tombée dans le  
precipice d'une desolation incroia-  
ble.

Voir ceste ville autrefois si opu-  
lante, reduite presque la corde au  
col, & à la barbe des Anglois, & en  
despit de leur Armée, sans leur en-  
tremise, & pendant mesmes qu'ils

enuoyent en Angleterre pour en faciliter la composition, voir les François estant dans leurs Armées se détacher d'auec eux, & se rendre à la mercy du Roy.

Luy demandant seulement la vie, joignez à cela le plus beau calme sur la mer, & le beau ciel que la terre ait jamais veu, cōtre l'ordre des saisons, voir dy-ie tant de misteres & de miracles ensemble, qui est-ce qui ne se pasmeroit d'aïse & d'estonnement, & ne publieroit les merueilles de Dieu visibles & manifestes en tous ses euenemens admirables & miraculeux, outre l'esperance certaine de la conuersion de plusieurs.

Je m'emporte vn peu, mais je croy que ie suis le moins emporté, les pauures Rochelois regardent la terre & le pain que l'on leur donne, avec des yeux hayres & enfoncez,



5  
pleins de honte & de confusion, &  
nous regardons le ciel tous ravis &  
hors de nous mesmes, avec joye, ac-  
clamations & mille benedictions.

Le traicté & les articles furent si-  
gnez par les Deputez le 28. Octobre *septm 6*  
jour de S. Simon S. Iude, qui estoit  
Samedy, jour de la Vierge, ce qui  
fut fait à Saussay, logis de M<sup>r</sup> le Car-  
dinal de Richelieu, ou estoient M<sup>rs</sup>  
le Garde des Sceaux, Marechal de  
Chombert, Marquis de Fiat, surin-  
tendant, d'Herbaut, & de Marillac,  
lesdits Deputez y souperent & cou-  
cherent, & y firent tresbonne chere,  
& Dieu sçait avec quel appetit leurs  
valets qui estoient plustost leurs en-  
fans ou par eux deguisez en valets,  
fourroient tout ce qu'ils pouuoient  
attraper de pain & d'autres choses  
dans leurs poches & dás leurs chauf-  
ses, & en deuoroient autant, avec

vne gloutonnie effroyable.

Le 29. Octobre lesdits six Deputez avec autres six, vindrent trouuer le Roy à Laleu, à trois heures apres midy, & apporterent lesdits articles signez du Maire & des habitans de la ville, & à l'abord de sa Majesté dans sa Chambre, ils se prosternerent à genoux fort bas, demadât & crians graces & misericorde, l'un d'eux nommé la Goute Aduocat du Roy, portant la parole, tremblant fit sa Harangue, qui fut bien humble & en bons termes, il confessa pour toute la ville l'enormité de leur rebellion, laquelle ils recognoissent maintenant, & qu'ils sortoiét comme des prisonniers de leurs cachots, où ils auoient esté soixante & dix ans sans auoir veu le Soleil ny la lumiere, laquelle ils voyent à present, en la face de leur Prince, aux pieds du-

quel ils se jettoient & luy demandoient la vie, luy promettant de luy estre plus fidelle à l'aduenir qu'ils n'auoient esté rebelles & desobeissans : Le Roy leur fit responce, Dieu veuille que vostre repentance vienne du cœur, aussi bien que de la bouche: Je scay bien que vous avez fait tout ce qui se peut contre mon seruice, mais puisque vous me demandez pardon, je le veux oublier: soyez moy bons sujets & vous me trouuerez plain de bonté pour vous. Ce fait ils retournerent à la Rochelle ceste nuit, elle fut encores fermée, & les forts aussi gardez de part & d'autre.

Le trentiesme dés six heures du matin M<sup>rs</sup> de Chomberg, de Marillac, de Vignolles, de la Curée & quelques autres Seigneurs entrerent dedans la Rochelle, assisté des

Regiments cy apres nōmez, & furēt  
 receus par le Maire , & les princi-  
 paux Bourgeois , & lesdits S<sup>rs</sup> se fai-  
 firent de toutes les places , Tours &  
 Ramparts , de tous les Canons &  
 munitions , & feirent sortir tous les  
 gens de guerre , qui ne se trouue-  
 rent que cinquante François , à de-  
 my viuans , & quelque cent An-  
 glois que l'on renuoye en Angle-  
 terre , le Regiment des gardes & des  
 Suisses entrèrent en mēme temps ,  
 pour garder la ville & Taddon , aussi  
 comme les Lignes & les Forts sont  
 gardez , pour quelque temps : Le  
 peuple a esté traitté si doucement &  
 si charitablement , mesmes par les  
 Soldats, qu'ils baïssoient & crioient  
 viue le Roy. Sa Majesté leur a fait  
 donner plus de dix mil pains , tou-  
 te la Cour leur en a donné. C'est  
 vne chose effroiab<sup>le</sup> de veoir les  
 morts



les morts hors & dedans la ville,  
 & les faces des habitâs plus mortes  
 que viues : Les grands & petits tât  
 de bonne que de petite condition  
 demandoient du pain à tout le  
 monde : Cela nous a tellement  
 adoucis, qu'au lieu que nous leur  
 desirions vne corde il n'y a que  
 troisiours, nous nous efforcions  
 de leur donner tout ce qui se pou-  
 uoit pour les nourrir.

Cela a duré iusques à deux heu-  
 res de la presdinée, & toute la  
 Cour est entrée dans la Rochelle  
 pour la voir, & Monsieur le Car-  
 dinal de Richelieu aussi, & les lo-  
 gemens y ont esté faits pour toute  
 la Cour: Le Roy a esté voir le tour  
 des murailles par dehors, & a passé  
 par la porte de Cogne, ou tout le  
 peuple a crié *Vive le Roy*, & de la est  
 allé voir le fort de Taddon.

Le Maire nommé Guitton a eu commandement du Roy de ne se plus qualifier Maire, à peine de la vie.

Nous auôs appris & sceu au vray dans la ville qu'ils ont mangé de la chaire de corps morts, & que depuis huit iours trois qui en mangerent moururent sur le champ. Nous auons toutesfois veu des meres nourrissantes encores leurs enfans, & auons veu des petits enfans bien beaux, & y auoit encores quatre vaches que l'on gardoit pour eux; Dieu les a voulu ramener en cest estat à leur deuoir,

Pour ce qui est des articles cela est long, & puis ils se verrôt publiquement, le principal est que la Religion Catholique sera publiquement exercée, & que leur Temple est maintenant entre les mains

du Roy pour en disposer, ils ont la vie & les biens, & la liberté de conscience leur reste à la disposition du Roy : Il n'y a point d'Hostel Dieu n'y d'Hospital où il y ait plus de charité à faire qu'en cette ville, toute pleine de pauvres & d'affamez, & la charité est double, parce que c'est faire du bien à noz plus grands ennemis, mais cela les fera recognoistre, voyât que nostre religion est si bonne & si pleine de pieté & d'amour enuers eux, laquelle nous apprend à obeyr à nostre Roy.

Les noms des quatre députez de la Rochelle qui auoient esté en Angleterre & estoient dans les Vaisseaux de l'Armee Angloise sont, Vincent Monstre, Bricault, Gobert, & vn autre : Ces quatre sont venus demander pardon au

Roy pour eux & pour les François qui sont avec les Anglois, le Roy leur a pardonné; Deux de ceux là, Vincent & Gobert ont esté chez Monsieur le Cardinal de Richelieu, & les deux autres sont demeurés en ostage dans le bord de l'Admiral du Roy: Ils ont demandé & obtenu leur grace, sans que les Rochelois en ayent rien sceu: Et côme les deputez de la Rochelle vindrēt trouver mondit sieur le Cardinal pour traicter: Il leur dit que leurs confreres de l'Armee Angloise auoient des-ia obtenu leur grace, mais ils ne le voulurent pas croire: Ce qui fut cause que mondit sieur le Cardinal leur dit qu'ils seroient bien estonnez s'ils les voyoient presentement, & en mesme temps il les feit venir deuant eux, dont ils furent tous estonnez & saisis, &



Monſieur le Cardinal les fit embrasser, ſans toutesfois parler, puis ils ſe retirerent. Ceste action eſt le coup de la reduction des Rochelois, voyant que les Anglois & les François leurs associez les abandonnoient.

Les noms des fix deputez de la Rochelle qui ont ſignez les Articles le 28. Octobre ſont les ſieurs Dangoulin, &c.

Le 31. chacun a pris ſon logis dás la Rochelle, & Monſieur le Cardinal de Richelieu, Garde des Sceaux, de Chomberg & toute la Cour y ſont venus loger, le Roy ny eſt point venus loger.

Le 1. Nouébre iour de la Touſſains remarquable avec la feſte des Morts qui ſuit, en ce que ce ſont deux feſtes que l'Hereſie a combatue, aſſauoir l'interceſſion

de tous les Saints & la priere pour les morts. Ce iour l'Eglise de sainte Marguerite où sont les Peres de l'Oratoire a esté reconciliée de grand matin par Monsieur l'Archeuesque de Bourdeaux, à cause que le Canon y auoit tué quelques habitans. Sur les 9. heures Monsieur le Cardinal de Richelieu a célébré la Messe, où toute la Cour a Communiqué de sa main avec vne grande deuotion.

C'a esté vne grande ioye de voir la Croix des Capucins & Recollets, & autres reliques par les ruës en Procession chantant *Te Deum*. Toute la ville s'est trouée deuplée cōme vn autre Paris, mais c'estoit de toute la Cour & de toute l'armée, car ce qu'il y auoit d'habitans se cachotent, où l'on ne voyoit que des spectres aux fenestres.

Du iour precedent iusques à ce iour sont morts plus de cent personnes pour

auoir trop mangé.

La presdinée du iour de la Toussaincts le Roy est entré dans la Rochelle en Armes par la porte deCogne, le peuple de la ville estant debors & à genoux à crier *misericorde*, le Roy dit, Grace, puis ils ont crié, *Vive le Roy*, Sa Majesté est allée droict à sainte Marguerite où le *Te Deum* a esté chanté, & Monsieur l'Archeuesque de Bourdeaux l'a receu à la porte de l'Eglise. Le Pere Souffrant y a presché & a dit entre autres choses que le Roy luy auoit dit pendant sa maladie à ville Roy, & au fort de sa fievre ou l'õ doutoit de sa santé, que nonobstant tous les maux qu'il souffroit, Dieu luy inspiroit vn grand desir d'auoir la Rochelle, lequel il n'a point quitté depuis, bien alors il n'y auoit pas apparence de songer au siege de la Rochelle, à cause que les Anglois estoient arriuez en Re.

Tout le Canõ de la ville a tiré a mesme temps, non pas contre le Roy, mais pour la gloire, comme aussi tous les Canons des Forts & des Batteries de Corail, chef de Boyers & des Vaisseaux.

Nous auons appris tant de miseres de

la ville par les habitâns mesmes que cela est incroyable, mais veritable entre autres vne mere a mangé sa fille estant en vie, vne fille a mangé les doigts a son petit frere. Plusieurs ont fait faire leurs bieres pour mourir, se sont mis dedans eux mesmes, & vne infinité d'autres miseres dont la posterité sera estonnée.

Nous auons trouué plusieurs corps morts non enterrez & gisans par les ruës, que l'on a enterrez ce iourd'huy.

Le Roy n'a point couché a la Rochelle, il est retourné coucher à Laleu, il y vient coucher demain.

Vendredy prochain se fera la procession du saint Sacrement, où le Roy & toute la Cour assistera.

Vn Rochelois apparent voyant la face du Roy a son entree, a esté tellement rayuy qu'il a iuré de renoncer sur le champ l'heresie, & de n'auoir plus d'autre religion que celle de son Prince & s'est conuertty.

Vn autre qui est Gentil-homme & des plus riches nommé Mōsieur de la Garde aux vallets s'est cōuertty volontairement.